

Date – 28/12/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Kumin tangka kum thla 7 chhung khan zinmi nuai 4, sing 4, sang 8 leh 28-in Mizoram an rawn tlawh.
2. Excise & narcotics department chhinchhiah danin kum 1997 atanga tun thlengin Mizoramah zu chhe in vangin mi 56 an thi tawh.
3. Kohhran tam zawkin Krismas ruai an theh ni, tun thla ni 26 khan Aizawl veng thenkhatah Mizoram pawn atanga lokal Krismas ruai theh ve an tam hle.
4. Thailand leh Cambodia ten ramri inchuhna inbeihna hmunah inkahhai an remti.

<><><>

TOURIST FOOTFALLS

Kumin tangka kum thla 7 (April leh October thla inkar) chhung khan zinmi nuai 4, sing 4, sang 8 leh 28-in Mizoram an rawn tlawh.

Tourism department director Pi R. Lalrodingi'n Akashvani Aizawl News a hrilh danin November leh December hi zinmi an tam ber lai a ni a. Department a he lam buaipuitute hi sorkarin pun khawm hrang hrang a buatsaiha an buai bakah mikhual awm zat hre theitu khualbuk neitute an buai avangin November thla a zinmi lo lut zat hi hriat hleih theih a la ni lo. Zinmi (tourists) nuai 4, sing 4, sang 8 leh 28 zinga nuai 2, sing 7, sang 8 leh 486 hi tualchhung mi an ni a, state pawn atanga lo zin hi mi nuai 1, sing 6, sang 2 leh 196 niin ramdang atanga lo zin (foreign tourists) hi mi 7,346 an ni. Sairang thlenga rel kawng a lo luh hnu, Guwahati, Kolkata leh Delhi atanga Aizawl khawpui daifem thlenga rel a a zin theih tak hnu hian ramdang atanga lo zin hi an pung nasa a rin sa a ni a, an pung hle tih a hriat bawk a ni.

Tourism department chhinchhiah dan chuan October thla kha zinmi lo luh tam ber thla a ni a, zinmi 96,224 an lo lut a, an zinga 1,358 chu ramdang mi an ni. Kumin tangka kuma zinmi lo luh tam ber dawttu chu April thla kha a ni a, mi 67,872 an rawn zin a, September thla khan mi 65,880-in Mizoram an rawn tlawh a, August thla khan mi 63,830 in an rawn tlawh a. Tlawhtu tlem ber thla chu June thla kha niin mi 47,937 an rawn zin a ni.

<><><>

CHAMPHAI NGOCC & MJA

Nimin khan Champhai District NGO Coordination Committee hruaitute leh Mizoram Journalist's Association Champhai District hruaitute chuan Champhai khawpui luhka, Khankawn atanga Kanan Veng inkar kawngpui laihzau mek leh Khankawn atanga Champhai khawpui zauhna tura Ring Road laih mekte a hmunah kalin an enfiah a.

He kawngpui laih zau tur km 3 leh a chanve chuang hreta a thui, metre 7 a zau tur hi kawngpui sira ram neitu mi thenkhatin compensation an beisei avang leh kawng sial zauna turin Cheng Vaibelchhe 12, SASCI sum ruahman zingah Compensation pekna tur sum a awm loh avangin kawng enkawltu Mizoram PWD in harsatna an tawh mek a, Champhai NGO Coordination Committee hruaitute chuan National highway Number 06 atanga Champhai khawpui luhna tur kawng hi a rang thei anga siam zawh an duh thu leh kawngpui sira miten harsatna siam lova, kawng laitu Mizoram PWD te nen inremna nei thuai se an duh tih NGO-CC Chairman, Pu Lalnunmawia chuan a sawi a ni

Tun dinhmunah, Khankawn atanga metre 350 a thui chu khawl hmanga laih zau mek a ni a, helai hmun hi Pu Zirlianthanga S/o Biakliana (L) New Saron Veng, Champhai chuan zangnadawmna engmah phut lovin a ram a laih tira, kawngpui metre 7 a zau turin kawng hi sial zau mek niin RDPL (Road Develop Private limited Company, Guwahati in an thawh mek a, Pu Chalbawiha, Champhai Vengthlang chuan Khankawn bula a huanah kawngpui laih zauhna leivung chu zangnadawmna engmah phut lovin a paih tir mek bawh a ni.

Hetihlai hian Khankawn - Thlangtlak mual - Falkawn to Hmunhmeltha ram - Zote, Ring Road sial thar mekah Vengsang leh Hmunhmeltha rama hmun/ lo /ram neitute (mi pakhat tih loh) chuan Zangnadawmna ngiat lovin an ram sial tlang an phal a, NGO-CC hruaitute chuan ram pe phalte chungah an lawm hle tih an sawi a ni.

<><><>

HOOCH DEATHS

Excise & narcotics department chhinchhiah danin kum 1997 atanga tun thlengin Mizoramah zu chhe in vangin mi 56 an thi tawh.

He department hian kum 1997 a zu chhe in avanga thi mi 4 (hmeichhia pakhat leh mipa 3) an awm atang khan an chhinchhiah tan a. Hemi kuma zu chhe inte in hi methylated spirit (zu a methyle pawlh) avanga thi an ni. Zu chhe in vanga thi 56 zinga 49 hi mipa an ni a, hmeichhia 7 an awm bawh. Zu chhe in avanga thi tam ber kum chu kum 2001 kha a ni a, hemi kum hian mi 14 an ti a. Thi zinga 8 hi methylated spirit in an ni a, 6 erawh chu an zu in dinhmun tak hriat chian a ni lo. Zu chhe in vanga thi mi 56 zinga a tam ber, mi 36 chu methylated spirit a pawlh in vang a ni a. Eng ang zu chhia nge a nih hriat chian loh in vanga thi 12 an awm a, Myanmar sipai zu, BEDC an tih mai in vanga thi 6 an awm a, Pethidine telh in vanga thi 2 an awm bawh.

Zu chhe in avang hian kumtinin mi an thi lova, kum 1997 leh kumin inkar hian thi an awm loh kum a tam zawh, kum 28 chhung hian kum 17 chu zu chhe in vanga thi an awm lo a ni. Zu chhe in vanga thi an awm hnahnun ber pawh kum 2022 kha a ni. Zu in nasat avanga hrisel lohna leh natna-in a tlakbuak avanga thite chu excise & narcotics department hian an chhinchhiah tel lo a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

AIZAWL AQI

Urlawk zan khan Aizawl-ah halpuah leh halmawi hal an awm meuh loh avangin boruak a thianglim tha hle.

Mizoram Pollution Control Board (MPCB) a mithiamte sawi danin urlawk zan (December ni 24) khan Aizawl Sikulpuikawn a boruak tha leh chhia tehna khawl chuan air quality index (AQI) chu 38 niin a chhiar a. Krismas ni pheih kha chuan AQI hi 33-ah awmin nizan khan 38 a kai chho leh a. Aizawl boruak hi a thianglim a, hriselna atana harsatna siam pha lova ngaih a ni a, 50 thleng hian a tha a ngaih a ni.

He tih lai hian Delhi khawpui a AQI chu vawiin hian 323 lai a ni a, hriselna atan a hlauhawm hle niin mithiamte chuan an sawi a ni.

<><><>

SUNSET FEST

Kolasib district SP Pu Lalrinpuia Varte chuan thuchhuah siam in December ni 31 chhun dar 12 atanga tlai lam dar 6 inkar chhungin Kawnpui atanga Aizawl pan turte chu Kawnpui-Sairang kawng lama kal turin a hriattir.

SP thuchhuahah chuan Director, Tourism department atanga lehkha an hmuh angin, December ni 31 hian Sakawrhmutuai Tlangah kum hlui Ni tla a huho a enna hun (Sunset fest/event 2025) Tourism Department leh Sihphir khawtlang te tangkawp in an buatsaih dawn a, he hun hi chawhnu dar 1 atanga tan tur a ni. He hun ah hian mipui tam tak pung khawm tura beisei a nih avangin lirthei kal vel pawh a buai phah dawn niin a lang a. Hetiang a nih avang hian Kawnpui lam atanga Sakawrhmutuai Tlang kal tlanga Aizawl lam pantuten harsatna an tawh loh nan December ni 31, chhun dar 12 atanga tlai lam dar 6 inkarah chuan Kawnpui via Sairang (Sairang road) lama kal tura ngen leh hriattir an nih thu SP thuchhuah chuan a tarlang.

National Highway Sairang pengah Kawnpui Police an duty dawn tih SP chuan tarlangin, he ni tla en programme chhim tum te erawh chu a hmun pan phalsak an ni ang.

<><><>

MANN KI BAAT

Prime Minister Narendra Modi-a'n vawiin chawhma dar 11-ah Mann Ki Baat hun, Akashvani-ah a hmang leh dawn a, radio-a he hun a hman vawi 129-na tur a ni. Prime Minister thusawi hi Akashvani leh Doordarshan network zawng zawng bakah AIR News website-ah leh Newsonair mobile app-ah te tihchhuah a ni ang a, AIR New, DD News, PMO leh Ministry of Information & Broadcasting Youtube channel-ah te, live-a pek chhuah a ni bawh ang a. Prime Minister thusawi, Mizo tawnga lehlin tihchhuah zui a ni ang.

<><><>

THAILAND-CAMBODIA CEASEFIRE DEAL

Thailand leh Cambodia-ten ramri inchuha inbeihna hmunah inkahhai neih an remti a, inkahhai thuthlung hi nimin khan Thailand Chanthaburi province-a ramri checkpoint-ah Thailand Defence Minister, Natthapon Nakpanich-a leh Cambodia Dy Prime Minister, Defence Minister ni baw, Tea Seiha-ten an zia fel a ni.

Kumin July thlaa inkahhai thuthlung a hlawhchham hnuah ram 2-te hi tun thla bul lam atang khan nasa takin an inkap leh a, Dangrek tlang ramri hrulah an inbei nasa zual a, sipai thi leh hliam thahnem tak an awm bakah indona hmun tlanhhiatsan, civil mi sang tel, chenna tur mumal nei lovin an awm mek a ni.

<><><>